

Jahresbricht vo der Trachtegruppe Gurzele 2020!

O i däm Jahr het aus ganz normau agfange mit de Sitzige vom Vorstand u der Liederkommission.

Am 15. Jänner het z Chörli wieder mit de Singprobe gschtartet.

Am 31. Jänner hi mir d Houptversammlig düregführt bir Familie Haldemann im Gürbmättli.

Mir hi dörfe zwü nöii Mitglieder i Tanzgruppe ufnäh!

D Jaqueline Thierstein u der Roger Ramel si istimmig ufgnoh worde.

D Silvia Beyeler löst Monika Hadorn aus Rächngsrevisorin ab. Der Walter Fahrni u Christine Reinhard löse der Markus Schneider i der Liederkommission u Theaterkommission ab.

Süsch isch aus glich blibe im Verein.

D Versammlig isch guet u ohni grossi Diskusione über Bühni gange.

Die zweiti OK Sitzig für z Gürbetaler Jodlerträffe hi mir am 4. Februar im Höfli z Seftige gha.

Am 15. Februar isch d Veteranenehrung vom BKJV z Thun düregführt worde.

Beatrix Fahrni u Hans-Ueli Reust si gehrt worde für 25. Jahr Mitgliedschaft im Jodlerverband.

D Beatrix het leider nid chönne mitcho uf Thun wäge Chrankheit, das isch schaaad gsi.

D BKJV Delegierteversammlung isch am Sunntig 16. Februar o z Thun durgführt worde.

Z Hanny, Hanspeter u i hi Teilnoh a der Versammlung .

Das isch gäng ganz e zufriedene Sunntig.

Am 19. Februar isch ds Gründigsglied Vreni Hänni beärdiget worde.

Der Sunntig 23. Februar isch reserviert für ga z singe u tanze i z Auters- u Pflegeheim Wattwil.

Mir chöi dene Seniore dert e grossi Fröud mache u der Sunntig chli verschönere. Es wird jetz o wieder meh gschätzt vo de Heimverantwortliche.

Thomas u i hi am 2. März a der Ortsdelegierteversammlung teilnoh.

Thomas het informiert über z Jodlerträfle.

D Gurzele Vereine si bereit üs z häufe im Septämber.

Ga Chegle si mir uf Riggisbärg am 6. März. Mir hi e zufriedene Abe gha bim Chegle u Euferraus spiele.

Am 11. März hi mir wäge Corona z letscht mau singe gha.

Am Mäntig 16. März isch aus zue ta worde. D Schule, Geschäft user Läbesmittu u d Restaurant.

Das het jetz grad längi Ferie gäh!!!!

Am 17. April isch üses Ehremitglied Hedi Wenger 100 jährig worde.
Mir hi nüt dörfe organisiere wieu z Heim ganz zue isch gsi. E
Bluemestruss mit eme Chärtli het d Marlies vom herzlich dörfe zum
Fänschter i abgäh. Das isch grad aus wo möglich isch gsi.

Ds Jodlerträffe hi mir mit em Vorstand vor GJV zäme ufe 12.
Septämber 2021 verschobe.

Am 19. Juni hi mir üs i der Gürbejadi troffe zum Brätle.
Eeehh isch das schön gsi anang wieder mau z gseh!
So hi mir o grad die nöische Infos chönne witergäh.

Am 5. Ouguscht het z Chörli sich troffe für drüber z Rede wie witer!
Mir hi beschlosse das mir i zwo Gruppe im MZG wieder tüe afa
singe. De isch me haut numme au zwo Wuche dra cho aber mi het
ömu wieder dörfe singe u zäme cho.

Am Afang het das üs ganz komisch tüecht so wit usnang z stah, aber
mi het sich dra gwöhnt u isch ganz guet gange.

Leider isch du am 7. Oktober scho wieder z letscht mau gsi mit
Singprob.

Bis ändi 2020 isch gar nüt meh glofe, kes Chiuchesinge, keni
Ungerhautigsabe, ke Seniorewiehnachte u ke Autjahrshöck.

Der Vorstand het a der Sitzig vom 30. Novämber beschlosse de
Seniore u üsne Mitglieder e Wiehnachtsbrief z schicke u e

Schoggiüberraschig dri ztue. De Mitglieder hi mir so o grad Infos chönne witerleite.

Das isch bi beide Gruppe guet acho u het Früüd bereitet.

Es isch nid es ifachs Jahr gsi!

Danke vieu mau de Vorstandsmitglieder für häufe die Entscheide z beschpräche u z traffe. Mi het ja eifach de Behörde müsse foug!

Für Sing- u Tanzleitig isch das o e schwäri Zyt, aber mir hoffe dir sit de o wieder bereit witer z fahre wes erlobt wird. O öich es grosses Danke!

O Euch liebi Mitglieder danke i ganz hätzlech das dir usharret u hoffentlich de wieder derbi sit we mir wieder dörfe singe u tanze.

Blibet witerhin aui Gsung!

Im Jäner 2021

Öii Presidäntin

Marianne Reust